

野

獲

編

補

遺

野獲編補遺卷四目錄

著述

經傳佚書

祝唐二賦

忠義錄

季漢書

獻異書

玩具

瑪瑙

書畫學

秦璽始末

印章

諧謔

兵法用烟

嗤鄙

大臣異服

侮人自侮

釋道

道家兩府

道官封爵

番僧封爵

真君封爵

廢佛氏

劄巴堅參

二徐真君之始

薩王二真君之始

張天師之始

真人張元吉

神仙

神名誤稱

雜

黃衣人歌

宮殿被災

清明日天變

聖主徵應

婦人髭

不男

牡猿化牝

並蒂瓜

致大鳥

鬼怪

凶宅

土司

八化異類

夷兵

土司文職

緬甸盛衰始末

六慰

大古喇

老撾之始

老撾反覆

夷酋三公

土教官

土官承襲

外國

華人夷官

外國誇誕

也先誇國寶

奉使仗節

奉使被議

奉使不行

針傳編補遺卷四

秀水沈德符景倩著 桐鄉錢 枋爾載輯

著述

經傳佚書

永樂中御史劉有年沅州人上儀禮逸經八篇上不省其後朝鮮國進顏子一部亦不收顏子在彼國今當尙存若儀禮則不可問矣二書無論真偽當非漢以後人所辦今乾坤鑿度等曆書盛行何獨遺二書不錄也近年癸巳日本議封貢禮部主事劉元卿疏言先秦徐福入海時必攜古經傳同往此時焚書事未起必有壁經

全書在倭宜詔取以補伏生之缺蓋祖宋時歐陽永叔  
日本刀子歌中語也時議以爲迂亦罷不行

### 祝唐二賦

成化宏治中吳中祝枝山唐六如先後負雋聲饒艷藻  
唐有金粉福地賦甚麗惜予未之見祝先有烟花洞天  
賦正堪與唐作對其後又有風流遁賦則皆俳語也余  
少時曾與友人睹鈔本尙憶得一二聯如畫堂內傳杯  
遞竿參幘著玉帳牙旗繡簾前品竹彈絲掩暎出高牙  
大纛又云四邊廂眼裏火假捏妖言一會子耳邊風虛  
張聲勢又云急鄧鄧通紅粉臉不過是詐敗作輸顛巍

魏咬定銀牙無非是裏應外合又云寸心千里坐守老  
營一日三秋肯離信地又云歡娛嫌夜短惟求却日揮  
戈寂寞恨更長那討聞雞起舞其他皆不及記詞雖淫  
媒亦自有致蓋二公皆老公車不得志寄跡平康以銷  
壯心卽見嗤於禮法士非所計也

忠義錄

景泰元年山西天城衛令史賈斌上言漢唐宋信用宦  
官馴致敗亡今宜法高祖事無大小必歸宸斷閹人不  
許竊柄臣於歷代忠義之臣撮其尤者爲忠義錄及特  
寵宦官附之乞刊布臣僚庶宦者不得行其奸宄矣



奏蓋懲王振之亂也禮部尙書胡濙言斌語雖有理然章聖皇帝臣鑑已行此書不必且斌擅自離役宜押發回衛上從其言後斌不知所終濙素柔佞不足道然以景帝素狎宦官而不免爲濙所惑讒口可畏哉

### 季漢書

近年新安人謝少連名陞者祖朱子綱目尊劉備爲正統作季漢書附魏吳於蜀漢之後盡斥陳延祚三國志自爲千古卓識一時鉅公如李本寧亦爲之叙其推許甚至間有議之者謂吳中先輩吳尙儉者已曾爲此書吳爲明經不仕今大參安國之父也然不知古人又生

編葺成全帙元世祖初年翰林學士郝經被命使宋請  
踐鄂州和議賈似道留之真州凡十六年遂買書作續  
漢史旣成而嘆曰辛苦十餘年莫不被高頭巾已做了  
經被放還甫至燕而歿然南宋初年廬陵有蕭常者固  
已修成續後漢書而周必大爲之序惜乎郝又未之見  
也可見前人識見高出後學遇事便出手做成蓋不特  
謝生之書非出觚見卽吳之舊本亦徒自苦耳○尊劉  
一說儒家奉爲律令而擯魏者至與新莽周舉同科此  
不必論當時劉姓同制一方者如虞如焉如表不幸而  
敗亡耳後來劉淵之紹漢季雄之興漢不幸而他姓耳

唐之後存勗稱唐然雖虜而實賜姓編入屬籍系鄭王  
房者至南唐之李昇則固吳王恪之後也據有江淮垂  
四十年其事與蜀漢無異何故不以正統與之豈其輔  
相庸碌無孔明其人者能聲大義致然耶

獻異書

本朝識緯之書皆有厲禁惟奇門六壬之屬人間多習  
之士大夫亦有篤好且奇驗者苦不得秘本真傳徒以  
影響推測耳太祖洪武二十二年河南開封府封邱縣  
民劉安壽進禁書其目曰五符太乙書一十種景祐太  
乙書一十卷附淘金歌太乙新歷十品各二卷九宮太

乙太乙八運太乙草算太乙祭法太乙神算五福十神  
太乙各一卷太乙局成書二卷遁甲書六種景祐符應  
經六壬心鏡祭法局算祭法符六甲乾經奇門五總龜  
各一卷六壬書十種兵帳賦玉律鈴法中黃五變經草  
裏尋針法訣心印諸賦大六壬斷訣雜六壬書東方朔  
射覆禽書各一卷意其中必有秘術秘訣今不知內府  
尚存此等書否至嘉靖末年世宗好元修遣御史姜敬  
王大任訪天下法秘歸而驟進學士於是方士趙天壽  
者進獻符法三十六本上曰法秘皆出真傳特授道錄  
司右演法勅還鄉已乞留靜虛觀爲上祈祝不許至四

十四年天壽又獻法秘二十三種上留覽終無他賞蓋上是時已覺方術之不足信矣太祖時劉安壽進書亦不聞有賜蓋亦竟罷歸去

玩具

瑪瑙

瑪瑙以西洋爲貴其出中國者則雲南之永昌府以色紅者爲上紅白相間者爲纏絲品最下製爲酒杯書鎮之屬凡市骨董者俱云宋做蓋本朝此石最少故屬之宋以昂其價二十年西洋瑪瑙通行天下其值不過玉之十一而色之奇幻質之瑩潤遠勝舊物聞出遼東宣

府一帶每塊至有重百斤者按宋政和四年汝蔡等州  
上言巖石多變瑪瑙地不愛寶聖瑞非常乞下詔封禁  
以供御用後數十年果不復再見今偶爾盛產他時乏  
絕必更踊貴亦理勢然也至如碧玉亦重西番向最艱  
得邇年亦大至中華以故雲南碧玉頓賤

### 書畫學

本朝列聖極重書畫文皇特眷雲間二沈度粲兄弟至  
直拜學士然其書不過元衲子山周伯琦緒餘耳尙不  
能敵宋景濂也畫學則宣宗篤嗜御筆渲染傳世不少  
而憲宗孝宗尤精繪事特人間不恒見耳又當時承制

里猶緒補遺 卷四  
待詔者僅僅林良呂紀之屬無能爲聖藝役較之宋畫苑諸公不啻重儔矣宋制書畫二學俱令習說文爾雅方言等書并論語孟子又各占一大經書以篆隸草三體隸法又以虞褚歐陽楷體爲宗畫以佛道人物山水鳥獸花竹屋木人主時出新意校試以第其上下至出身畧與算學同以故宋世書畫遠非本朝可企萬一以今太平盛世亦宜講究及此

### 秦璽始末

秦璽傳授其說不一據元世祖至元三十一年甲午正月御史臺通事潤潤朮告太師國王木黎華之孫拾得

之家得玉印命御史楊桓辨其文爲受命於天旣壽永  
昌真古傳國璽且以出處始末考據以上云子嬰奉璽  
降沛公傳至孺子藏於長樂宮王莽篡位使安陽侯王  
舜迫太后出璽投之於地更始滅莽校尉公賓得之獻  
於更始赤眉殺更始立劉盆子爲其所有盆子奉璽降  
於光武至董卓等作亂掌者投於井中孫堅征卓得之  
袁術奪之於堅妻術死荊州刺史徐璆聞獻帝爲曹操  
迎在許昌以獻之帝遜位以歸魏魏歸晉至懷帝遇害  
璽歸劉聰傳曜因入石勒及石虎滅冉閔爲其將軍蔣  
幹所得以送晉征西將軍謝尚晉始復有此璽隋滅陳



得之隋亡蕭后攜入突厥至唐貞觀四年后奉璽歸唐  
後朱溫篡唐入溫莊宗滅溫入後唐傳至明宗子從珂  
石氏入篡珂自焚璽不知所在至宋哲宗咸陽民段義  
得之以獻至徽宗爲金所虜寶璽俱去此璽在焉今出  
者是也楊桓之說如此後順帝出亡璽歸沙漠宣德景  
泰天順三朝虜酋挾以自誇稱欲進獻者俱祖此說今  
儒生輩皆尊信其言以爲秦寶未入中國乃聖朝缺事  
而實不然宋李心傳云曹魏刻璽如秦之文但秦讀自  
右魏讀自左秦璽已不在魏矣晉人自刻璽曰受命於  
天皇帝壽昌永嘉之亂沒劉石而仍歸江南皆晉璽也

晉太元十九年西燕慕容永以玉璽求援於魏恆傳侯  
景北齊辛術得之以獻高氏傳至隋皆以誤爲秦物而  
實慕容璽也晉義熙十三年劉裕入關得於關中歷宋  
齊梁陳而復爲隋有者姚秦璽也後晉開運之亂沒於  
耶律者其文曰皇帝景命有德者昌乃石敬瑭倣唐太  
宗舊文爲之此石晉璽也當時皆誤以爲秦璽而秦物  
亡已久矣據心傳考證其詳核勝楊桓遠甚則今北虜  
所寶者正不知何代所作五代會要又曰梁臺城之破  
侯景得之景敗其將侯子鑒匿之投於棲霞寺井中僧  
永行又匿之至陳永定二年永弟子始以璽上不云入

於高齊也又云隋江東之禍爲字文化及得之化及敗歸竇建德及建德敗其妻曹氏以獻於唐不云隋蕭后以攜上太宗也又云同光間內難竇爲火灼文字訛缺清泰之敗以竇隨身自焚竇遂亡失然則秦璽之灰正在此時後來宋元符元年咸陽民所得者元至元末拾得所售者又何物也况秦初刻時旣以爲趙璧則卞和所寶蘭相如所奪皆是物矣世本又云秦取藍田之玉命李斯以大篆書之王孫壽刻之制如魚龍鳳鳥之狀希世之至寶但不明著其文云何而晉書直云始皇刻藍田玉曰受天之命皇帝壽昌漢高祖佩之名曰傳國

璽是秦自有兩璽其文本不同至晉謝尚所得正與藍田玉璽文同但其文非受命於天既壽永昌故李心傳斷以爲晉刻而當時說者又云其文龍飛鳳翥不足擬其勢爲摹印之祖則又似真秦制非典午時所辨矣然魏太武太平眞君七年毀鄴中五級佛圖於泥像中得玉璽二其文皆曰受命於天既壽永昌其一刻其旁曰魏所受漢傳國璽按此則秦璽又入元魏而鄴爲曹魏舊都浮屠所藏正祖疑塚故智李心傳所云秦璽不在魏又屬臆說且并晉書所紀亦不足信矣元所得璽上刻螭形其旁無所謂魏受漢璽字其非秦璽明甚楊桓

何所據而定以爲傳國璽耶且當時考訂更屬可笑楊  
桓所辨旣書受命於天旣壽永昌皇后宏吉烈氏手授  
成宗於卽位之日矣而楊桓傳中又曰受天之命旣壽  
永昌何耶况秦璽爲漢元后所擲已缺一角今相傳者  
不言其形似又完好如初想後世得璽者皆知非故物  
姑借以塗耳目耶通鑑又云石敬瑭作受命寶其文云  
受天明命惟德允昌又與倣刻唐太宗受命寶不同則  
開運間獻於契丹者果屬何璽耶今但就近世驗之後  
唐莊宗得魏州僧傳眞所獻傳國寶遂卽大位不三年  
而死於亂兵宋元符得不二年而哲宗崩徽宗卽位天

下遂亂元世祖亦卽以得璽之年殂於大都矣卽阿魯  
台也先輩攘竊紛紛不旋踵著僂設使眞爲趙璧亦非  
嘉瑞宜聖明之無取也○漢元后之擲璽也已目爲亡  
國不祥之物矣逮後沒於劉石北人珍之至稱東晉諸  
帝爲白版天子及永和間得璽於後趙始以正統歸之  
而晉人以璽至建康百僚畢賀其重又如此至若郗恢  
所得西燕之璽傳之蕭梁爲侯景侍中趙思齊與郭元  
建因攜入北獻於齊文宣歷宇文入隋文帝命爲傳國  
璽又改名受命璽及平陳始得秦眞璽然謂秦寶爲後  
出且來自亡陳仍以北朝所傳爲第一而秦璽次之隋

亡寶建德妻以二璽俱獻長安至唐末業已亡失迨宋  
哲宗受段義之獻遂改紹聖之三年爲元符以昭神貺  
蔡京請以五月朔受寶其禮一同大朝會命名曰受命  
寶其時何等張皇至徽宗大觀元年又得美玉用舊印  
文摹刻曰承天福延萬億永無極九字尊之曰神寶而  
元符受命之寶遂斥不用其輕之又如此至高宗南遷  
又自作受命寶其文一如秦璽曰受命於天旣壽永昌  
爲十一寶中之第二至北軍入臨安宋遣賈餘慶等奉  
傳國璽納降於伯顏伯顏卽遣囊加馳獻於世祖則拾  
得所收與阿魯台也先所攘又安知非宋南渡時物也

楊桓所考首云受命於天既壽永昌此秦璽本文傳至  
石勒冉閔仍歸之晉正與拾得所藏照合其說似矣然  
當時冉閔太子智獻晉求救都督載施馳先入者其文  
乃爲受天之命皇帝壽昌與太元間郗恢再得於西燕  
者無異然與桓所稱秦璽全文判然不同何以強合之  
一其說之矛盾背馳乃至於此因思東晉穆帝與孝武  
兩朝所收北方二璽俱非秦初刻之文最後劉裕入關  
上之晉恭帝者始爲受命於天既壽永昌八字李心傳  
但知駁晉三次得璽之非真而謬云郗恢所獻文如秦  
璽又失紀魏太武鄴下塔中之物俱不免罅漏然終不



謂哲宗所受爲真若楊桓曲諱後唐潞王焚璽之事遂直以宋元符所獻者當之傳會以實其事以故亡元遺種猶得珍爲異寶誇示中國耳然其誤又不始此也後趙石虎克上邦時旣得劉曜傳國璽送之石勒矣至石虎僭稱天王又得璽於韓强其文如秦初刻則石氏已自有兩璽前燕慕容儁之滅冉閔也其璽已進之江南矣而儁又自謂獲傳國璽爲閔后董氏所獻封之爲奉璽君因僭卽帝位改元曰元璽是時鮮卑與中國又各據一璽爲重及後秦姚萇之擒苻堅索其傳國璽堅怒叱之以璽送晉爲言則燕晉之外又有一璽矣北齊天

保三年得璽於辛術以爲卽永利間冉智歸之晉者然  
其文爲受命於天旣壽永昌與晉書所辨文相去蓋高  
氏習聞劉石得於永嘉者眞爲秦物以此璽屬之其誤  
何待言此後南北又隔至隋唐俱稱得璽然所寶用者  
果爲謝尙所上耶劉裕入關所得耶高齊所受於侯景  
耶魏太武所剖於佛像耶總不可得而知至後唐莊宗  
時魏州僧獻璽自云其師得於僖宗廣明元年黃巢入  
長安時至是已四十年則後來光啟二年幸蜀僖宗付  
王建負之以從及唐禪梁命楊涉奉以入汴朱溫末年  
付朱友文妻及朱友貞將汴鄭珏請懷以詐降唐軍者

不知又皆何物何以俱云傳國璽也若楊桓所言宋哲宗時段義獻之朝者爲金虜去元時始出其說亦似可信但金太祖天武七年斡離不敗遼主於應州因得傳國璽以獻此時金宋兩邦方睦尙未交兵也又史稱金哀宗走蔡州宋會元兵入城自焚與傳國璽同燼則遼宋破敗時各失傳國璽而金亡又并璽一炬爲真爲僞漫無證佐況御覽又云天子有傳國璽文曰受命於天既壽且康其文又與秦兩璽不同今世傳宋薛尙功舊本璽文尙有三種卽博洽通人未敢定其孰爲秦物況蒜酪胡奴可責以博古耶○拾得一作世德又作碩德

趙思齊一作思賢戴施一作戴僧施楊桓所云王莽校尉乃姓公賓名就今但云公賓亦誤況公賓就得璽以與王獻憲自收之李松入長安斬憲始送璽詣宛上之更始亦非公賓就自獻也事詳御覽○遼興宗重熙七年試進士賦以有傳國寶者爲正統八字爲題其寶之如此至天祚帝保大二年出亡失寶於桑乾河因以失國得非識耶

### 印章

古來印章俱用銅王者璽用玉次則王侯用金漢人私印間亦有玉今多傳世價頗不貲唐人自名與字之外

始有堂室私記如李泌端居室是也然皆銅耳銀印自魏晉間光祿大夫有銀青金紫之異然止施之官署本朝白玉璽外凡國寶及親王或賜番王俱用金其二品以上俱用銀印其私印用牙始於宋時我朝士人始以青田石作印爲文房之玩溫栗雅潤遂冠千古

諧謔

兵法用烟

宋相江

應昌

侍郎經略朝鮮命將士積草發烟以禦倭

奴衆謂此等兵法古不經見馮開之先生云此法不載六韜三略僅於孟子見之坐客駭問汝馮徐曰首篇

有之矣不日齊人伐句燕勝之乎一坐絕倒

嗤鄙

### 大臣異服

馬尾裙者不知所起獨盛行於成化年間云來自朝鮮  
國其始閤臣萬安服之既而六卿張悅輩俱效之獨禮  
部尙書周洪謨至重服二腰尤爲怪事萬眉州亦何足  
責如洪謨素以理學自命哆口談天下大事服之不衷  
下僚且不可況司風化重寄何以示四方雖遭彈射直  
至宏治初元始去位亦覲顏甚矣似此服妖與雉頭裘  
集翠裘何異今中國已絕無之向在都見高麗陪臣出

館袍帶之下摺四張蓬然可笑意其尙服此裙耶

侮人自侮

吳中人士好爲滑稽尙有一年少庠士吻流也一日遇所善僧戲曰禿子之禿字若爲寫僧應聲曰卽秀才秀字掉轉尾去士爲屈服又嘉靖間吳中縉紳有文名者伯仲三人俱高第以建第出勞木工因謔之曰汝太辛勤當買一綠絹爲汝製幘裴之匠謝曰安敢煩製新幘但得主翁所戴做者見惠足矣此紳家門素有范蔚宗之謗竟慚慙不能對

釋道

道家兩府

宋道君崇道教至有道家兩府之目謂其尊貴如中書省樞密院也然林靈素署銜不過曰大中大夫沖和殿侍宸金門羽客通真達靈元妙先生在京神霄玉清萬壽宮簡轄提舉通真宮其官稱本與朝士攷異而侍宸視待制亦正四品而已至陶仲文於真人之外加至少師兼少傅少保並拜三孤帶禮部尙書封恭誠伯則文武極品矣林靈素尙守本教不畜妻子仲文之子旣比執政受京堂蔭矣至仇鸞死後敗僂仲文亦以元功蔭次子世昌爲國子生其義何居○陶仲文先拜真人卽



封父母并妻給誥命蓋用龍虎山張氏故事而其妻封誥乃得一品夫人不稱元君又張氏所不敢望

### 道官封爵

太祖旣封張正常爲大真人掌天下道教矣其子宇初又襲職封爲正一嗣教道合無爲闡祖光範真人仁宗封劉淵然爲沖虛至道元妙無爲光範演教莊靖普濟長春大真人而弇州異典誤以爲宣德間事又封道士沈道寧爲混元純一沖虛湛寂清淨無爲承宣布澤助國佑民廣大至道高士階正三品宣德元年從禮部尙書胡濙請進封正一嗣教清虛沖素光祖演道崇虛守

淨洞元真人張宇清爲大真人領天下道教蓋宇清以  
劉淵然已爲大真人意欲與之並上不得已勉從之且  
示訓於其號中至三年又賜張懋承爲正一嗣教崇修  
至道演法真人周思得爲履和養素高士蓋道教之崇  
仁宣二廟已然世宗朝之邵元節陶仲文已權輿於此  
矣

番僧封爵

永樂三年賜尙師哈立麻法王佛號十年又賜其徒尙  
師毘澤思巴法王佛號弇州紀之異典矣而不知宣宗  
亦崇佛教也宣德九年六月遣禮部尙書胡濙同成國

公朱勇持節封釋迦巴失爲萬行妙明真如上乘清淨般若宏照普應輔國顯教至善大慈法王西天正覺如來自在大圓通佛蓋又不待成化年間之尙師劄巴堅參與領占竺輩矣且宗伯掌文學而下行贊御之役其品安在哉

眞君進爵

成化二十二年進封二徐眞君爲金玉二闕上帝上帝命少傅大學士萬安往靈濟宮致祭太常寺謂祭舊用素饌今旣封帝宜改用牲上命惟朕誕辰用太牢餘如舊至宏治十八年冬至遣大學士李東陽祭靈濟宮少師

劉健等言二徐之廟建於石晉時二人生爲叛臣死爲逆鬼不當使輔臣往祭時武宗初卽位乃改命太常寺官若劉晦菴者可以言禮矣彼萬文康者其柔佞倍於胡忠安以預遣爲幸要之釋道二家均不足煩閣部大臣也○按永樂十五年加封徐知證徐知諤二真君曰九天金闕明道達德大仙顯靈溥濟清微洞元沖虛妙感慈惠護國庇民崇福洪恩真君九天王闕宣化扶教上仙昭靈溥濟高明宏靜沖湛妙應仁惠護國佑民隆福洪恩真君凡三十四字至加上帝號則僅十八字爵雖崇而微稱減矣宏治初年追寢帝號仍稱真君

廢佛氏

除佛之禁莫酷於元魏太武帝時用崔浩言盡誅沙門  
焚毀經像下令人間不出沙門者門誅浩至以妻所誦  
經投廁中不三年而浩受誅至夷三族其得禍亦最酷  
次則唐武宗會昌中用李德裕議毀寺四千六百招提  
蘭若四萬餘區歸俗僧尼二十六萬人不一年而德裕  
貶朱崖以死次則周顯德中毀天下寺院三萬三百有  
奇僧四萬二千尼萬八千而江浙湖廣吳越并晉不與  
焉并毀佛銅像鑄錢又次則宋宣和中除佛教改佛爲  
大覺金仙佛寺爲神霄宮僧加冠簪爲德士其事皆微

宗獨斷法師永道一疏歷陳往事以諫不免刺配而蔡京附會將順又結左街道錄徐知常以媒進又欲合方士王仔昔着黑幘頭鐵簡以取燕山然與林靈素爲深仇其罪差輕故周世宗出師幽州疽發於胸旋軍而殂道君北遷終殞沙漠而蔡京僅貶死潭州蓋大禍獨萃於兩主焉本朝嘉靖十五年上旣勅廢禁中大善佛殿建太后宮矣禮部尙書夏言以殿中有佛像及佛骨佛頭佛牙等乃建議請勅有司俱瘞之中野以杜愚冥之惑上曰今雖埋之豈無竊發以惑民者可議所以永除之於是言復議投之火上從之凡毀金銀佛像一百六

聖續編 卷四  
十九座金銀函貯佛頭牙等一萬三千餘斤燔之通衢  
此舉皆夏一人力主之亦越十年夏坐法死西市竟無  
後豈真竺乾氏能爲祟耶抑數之偶合也

劄巴堅參

據憲宗史劄巴堅參外同時封者有劄實巴爲清修正  
覺妙慈普濟護國演教灌頂宏善西天佛子大國師鎖  
南堅參爲靜修宏善國師端竹巴失爲淨慈普濟國師  
俱賜誥命西僧以秘密教得奉服食器用擬於王者出  
入乘金輿輿衛士以金吾仗前導遠官莫不避路召入  
大內誦經呪散花米贊吉祥日給大官酒饌牲餼者再

錦衣玉食者幾千人中貴跪拜俱坐受法王等號有增  
至數十字者考秘密法卽胡元演撲兒法也元順帝以  
此寵信淫禿以亂天下至是番僧循用其教以惑聖主  
然元時所封以西天佛子爲貴極今以爲第二等號所  
稱法王者直呼曰佛卽於彼教亦僭紊極矣幸逃顯戮  
至孝宗而仍還京師豈秘密法真如元人所譯爲大喜  
樂耶

二徐真君之始

今都城靈濟宮二徐真君故五代徐溫子知證知諤初  
祀於福建之會城名洪恩靈濟宮我成祖永樂十五年



聖躬不豫或云神靈異旋禱之而效又云夢授靈藥因  
並封爲金闕玉闕真人立廟京師賜額如閩中次年加  
封眞君正統初又加爲崇福隆福眞君至成化二十二  
年加伯號曰九天金闕總督魁神洪恩靈濟慈惠高明  
上帝號曰九天主闕總督聖神洪恩靈濟仁惠宏淨上  
帝先已有四時皮弁冠大紅雲龍服至是又加平天冠  
明黃羅紵衣神父亦加高上神王慈悲聖帝其袍在京  
四時更換焚化不必言且每遣內官入閩賫送如京師  
至宏治元年禮部尙書倪岳疏正祀典廢諸淫祀他神  
俱已得旨惟二真人僅革帝號及冠袍而福建冠服仍

六年一次差官不盡革也成化末年濫典俱李孜省鄧常恩輩爲之倪青溪毅然奏革孝宗斷然力行足光新政但福建之祀謂二徐提兵平福建閩人德之圖像以祀至宋而賜今額按徐氏專政時全閩尙爲王延鈞所據至王曦遇弑延政亂國南唐遣查文徽邊鎬等入取其地尋爲留從效所據而福州入於吳越錢氏是時李昇篡位已沒其子璟嗣位二徐足跡何由涉閩境也則不但本朝祀典爲不經并宋時君臣於近代事亦殊憤憤

薩王二真君之始

國朝永樂間杭州道士周思得居京師以王靈官法降體附神所謂靈官者爲玉樞火府天將在宋徽宗時先從天師張繼先及林靈素等傳道法又從師蜀人薩真君諱堅者學符術因請於上建天將廟於禁城之西宣德間改廟爲大德觀封薩真人爲崇恩真君王靈官爲隆恩真君成化年間改觀曰宮又加顯靈二字每年四季遞換袍服焚化如靈濟宮而珠玉錦繡歲費至數萬焉據元人雜劇有薩真人夜看碧桃花者蓋祖此至王靈官今神廟俱有之若武當山則處處皆是如釋氏之伽藍不知何以獨顯於鄮城乃爾此二官者俱在京師

兌隅雄麗軒敞不下宮掖而他正神列在祀典者願寂寂無聞豈神之廟食亦有數歟

### 張天師之始

張天師名道陵字輔漢生於漢光武十年居吳之天目山以符水治病靈帝永壽元年白日上昇年百二十歲唐天寶七年冊贈太師中和四年封三天扶教大法師宋熙寧中加輔元二字大觀二年冊號正一清應真君子孫相傳以至於今東晉王曠王羲之父子俱奉其道後魏寇謙之以其教授太武帝及宰相崔浩至宋真宗賜其裔信州龍虎山道士張正隨號真靜先生立授籙

院及上清觀蓋其時崇奉天書故有天師之稱胡元至元十三年始命張氏三十六代道士張宗演爲輔漢大帥演道靈應沖和真人遂真拜天師至於今俚俗相傳猶循此稱本朝洪武元年八月始革教主天師之號封張正常爲正一嗣教護國闡祖通誠崇道宏德大真人秩二品隆慶中降爲提點六品至今上丁丑仍復真人其中有故一時言官不能救正然每子孫赴吏部承襲時必青衣小帽進驗封司門報道士進來叩四頭司官坐受至襲號見部始加禮貌○洪邁云徽宗政和間張氏三十代孫虛靜天師治同州白蛇事最異至宣和二

年又治蔡京孫媳被魅更爲靈怪後知汴京將亂潛歸鄉尸解去復隱峨眉出蜀人時見之虛靜平生不娶遂無嗣以族紹其後蓋其嫡派自北宋已絕宜其法之無傳也

真人張元吉

天順元年正一嗣教沖虛守素紹祖崇法妙契元機宏悟大真人掌天下道教事張元吉進封爲沖虛守素紹祖崇法安恬快樂清淨元同大真人妻胡氏封志和履善沖靜元君賜以誥命至天順八年憲宗卽位又疏請加封號且請改母封爲太夫人并乞加六字爲號吏部

執奏云無故事上曲從之改封體元悟法淵默靜虛闡  
道宏化妙應大真人其母加慈和端惠貞淑太元君獨  
不封太夫人耳至成化五年元吉殺人事發其死者皆  
下私獄幽暗慘酷或縊之或囊沙壓之或縛投深淵凡  
殺四十餘人至有一家三人者其他僭用器物擅易制  
書強奪良人婦女詐取平人財物不可計數上命械至  
京庭鞠之具服刑部擬凌遲處死流其妻子黨與絕其  
蔭封仍籍其族而徭役之上命監候待誅刑科都給事  
中毛宏等執奏云元吉於十惡之內于犯數條萬一死  
於獄中全其首領無以泄神人之憤乞卽押赴市誅之

上命仍監候未幾赦元吉杖一百戍甘肅衛又以母老乞恩復命還家竟死牖下其子元慶仍得嗣爲真人又傳至嗣孫張永緒荒淫不檢死無嫡子爲吏部主事郭諫臣所奏不當復襲江西守臣又言張無功於世有害於民宜永裁革禮部覆奏請革封號以裔孫張國祥爲上清觀提點改鑄提點印上從之其後復襲真人卽以國祥嗣爵其人時時入朝京師頻留主齋醮與其子爲狎邪之遊各買樂婦爲姬妾至今遨遊諸貴戚間飲博諧諠之外他無所解

### 神仙



神名誤稱

近來狹邪家多供關壯繆像余竊以爲褻瀆正神後乃知其不然是名白眉神長髯偉貌騎馬持刀與關像畧肖但眉白而眼赤京師相詈指其人曰白眉赤眼兒者必大恨成質首仇其猥賤可知狹邪諱之乃駕名於關侯坊曲娼女初薦枕於人必與其艾豕同拜此神然後定情南北兩京皆然也又蹴鞠家祀清源妙道真君初入鞠場子弟必祭之云卽古二郎神又云卽徐知證知誥余思二徐已祀於京師靈濟宮恩寵踰制何又可白打之戲耶是未必然

機祥

黃衣人歌

洪武五年中書右丞王溥奉命督工取材於建昌至蛇  
舌巖衆見巖上有衣黃衣者歌曰龍蟠虎踞勢豈堯赤  
帝重興勝六朝八百年終王氣復重華從此繼唐堯其  
聲如鐘歌訖不見溥遣人來言上以事涉妖妄不之信  
細按其語龍蟠虎踞本金陵舊語赤帝爲漢而漢高祖  
以乙未稱漢王我太祖亦以乙未渡江建元帥府用李  
善長汪廣洋等爲僚屬與蕭曹正同六朝之祚訖於陳  
後主貞明之乙酉自此金陵不復爲正統都城至太祖

始定鼎恰七百八十年比文皇靖難師入則距陳亡時  
入百十三年正所云八百終而王氣復者文皇卽位已  
決都燕之計重華紹唐正合二祖堯舜相傳故事蓋於  
兩朝開緒靡弗合者意黃衣者固卽周顛仙張三丰之  
前茅而陳希夷邵堯夫劉秉忠輩之後身也因閱史僭  
爲解之

### 宮殿被災

永樂十九年辛丑夏四月初八日庚子三殿災正統十  
四年己巳夏六月南京宮殿災宏治十一年戊午冬十  
月兩宮災正德九年甲戌正月乾清宮災嘉靖二十年

辛丑夏四月辛酉九廟災嘉靖三十六年丁巳四月十三日丙申奉天門并三殿午門災嘉靖四十年辛酉十一月萬壽宮災萬曆二十四年丙申三月癸卯九丙子南宮災萬曆二十五年丁酉六月十四日戊寅三殿災其年月支干俱巳酉午戌及丙丁戊辛說者以爲此天道實爲之竊不敢謂然今按宮殿被災惟世宗丁巳與今上丙申丁酉尤爲酷烈前殿正殿雖燬而外門尙存若非大慶及朔望升殿尙可御門行常朝之禮今禁廷一望俱爲瓦礫之場殊非盛朝景象然世廟與今上正值倦勤靜攝之時警蹕傳呼久已絕響雖天心示儆或者

聖主心固與天通耶今一切大禮俱改行於文華殿偏  
窄淺隘大損觀瞻憶嘉靖丁巳之災至壬戌年已落成  
相去僅五十六年今礦稅流毒遍滿區宇動以三殿兩宮  
大工爲辭且云停止有日正不知告竣何日也  
清明日天變

成化六年庚寅二月二十八日爲清明節節後三日辰  
時都下大風從西北起下雨如血天色如絳紗日色如  
暮夜室中非燈燭不能辨直至午未間始開朗後至隆  
慶元年丁卯二月十八日清明節是日驟寒如窮冬至  
晚大風雪京師城內九門凡凍死者一百七十餘人崇  
文門下肩輿中婦人并所抱孩子俱僵死并輿夫二人

亦仆俄亦僵踞不復活去成化凡九十八年暮春有此異事不知徵驗何屬

### 聖主徵應

孝宗初在東宮以萬貴妃相隗日在危疑值成化二十一年乙巳二月初五日丑時泰山忽震三月一日丑時大震戌時又震五日丑時又震三十四日又各震一次十九日震二次內靈臺奏泰山震方此青宮不安之象憲宗大悟立命選婚儲位從此益安至宏治十八年春朝鐘新成其鈕忽絕奉天門寶座之石忽自裂至五月初九日上巳大漸忽黃霧四塞加以大風咫尺不辨

午後上遂升遐蓋龍潛之年與鼎湖之年山岳金石以至風霧各著靈異如此宜其列聖中第一聖也

### 婦人髭

婦人有髭者唐則李光弼之母宋氏酒媪朱氏元則順帝至正十一年正月京師齊化門東一婦人生髭尺餘本朝則宏治十六年湖廣隨州應山民張本華妻崔氏生髭三寸餘見之邸報鄱陽邸婦人美髭人呼爲三鬚娘見之紀載若宦官則惟宣和間廣陽郡王童貫領下鬚數十莖他不多見本朝太監劉馬兒爲帥西征臨戎必戴假髯以令其衆蓋取威重如蘭陵王假面入陳耳

不男

男子生而隱宮者內典以爲人中惡趣有五種不男曰生堅妬變半且有五種不女曰螺筋鼓角線俱終身無嗣育如古帝王貴人亦有之晉廢帝海西公有隱疾漢武陽侯樊市人不能爲人元魏仇各齊生非男北齊臨漳令李庶之天閹隋大將軍楊約之爲虜所傷皆是也本朝藩王則楚王英煥亦傳聞不男大臣則楊文襄一

清倪文毅

岳

及近年士人閔工部

夢得

俱云隱宮無嗣

息其有無罪而自宮者國初太常卿邱元濤以辭賜官女金吾指揮同知傅廣以求入內廷隆慶間戚畹李文



進以隨侍今慈聖皇太后入官仕至御馬監太監賜蟒  
玉卽今武清侯李文全同產弟也今莆田王繼祀以少  
年讀書苦思慾自去舉九又聞嘉靖末年閩人戶部主  
事柯維麒以修宋史新編求絕房室專功亦如太史公  
下蠶室故事此馮開之祭酒及于中甫比部者王與柯  
乃孫茂竹同年進士其言或有據○宋宦官梁師成自  
託蘇軾出子及用事後復應進士舉登上第仍供內役  
此古今所無若本朝翰林庶吉士敬成坐晉王濟熺事  
腐刑爲邸府典寶以潛邸恩陞太監尊寵一時其宦績  
竟與司馬遷無異却與梁師成相反又元順帝至正間

有趙伯顏不花者年三十餘有妻子矣爲順帝所闢後  
官至樞密院使大貴用事此夷虜之俗與元魏制彷彿  
牝猿化牝

隆慶二年山西男子李良雨化女一事見之奏牘天下  
所信近日有傳其僞者後見郎氏七修類稿之雄黑猿  
多有化爲雌者余怪笑謂郎老儒爲人所紿及見嘉靖  
間吳興王濟者曰詢堂手錄則云廣西橫州山中猿皆  
黑老則轉爲黃其勢與囊俱潰去化爲牝與黑而牡者  
交輒孕此王在彼中所親見者蓋其地凡爲猿者皆然  
矣猿旣變黃又數百年則化而爲白但旣白之後爲牡

爲牝遂不得而知矣然則白猿公劍術亦屬老牝耶宇宙非目覩者斷不可臆斷○向傳兔生俱牝望月而孕近偶畜兔則雌雄各具其孽尾如恒獸古語蓋難盡信並蒂瓜

史云洪武五年句容民獻二瓜俱同蒂禮部尙書陶凱奏曰句容上祖鄉連蒂之瑞獨見於此上曰草木之瑞如嘉禾並穗連理合歡兩歧之麥同蒂之瓜皆是以歸德於朕朕不德不敢當且草木之祥亦惟其土之人應之於朕何預但賜其民錢一千二百而已史不著其民姓名按其民爲張觀產瓜未幾兄弟坐事并斬於市太

祖之卓識不必言更似有先知之旨焉意者同蒂卽聯  
戮之象歟近日民間池塘開並頭蓮者俱非吉徵如嘉  
靖九年楊石淙相公家并丁卯橋及他莊三處開蓮俱  
作並頭人以爲名還吉兆秋八月楊以疽背卒且予所  
見開並蒂蓮家其人多夭亡不特楊也又頃甲辰歲湖  
廣撫臺署中池內有蓮一莖開七花楚中士人盛爲詩  
歌美之是年撫臣趙寧宇遷尙書人以爲瑞蓮休徵至  
閏九月有宗室之變趙殞于非命去蓮瑞亦僅數月耳  
○嘉靖十年曲周縣產瓜並蒂者二瓜中更生枝者一  
縣丞侯廷訓繪圖以獻上奇之以示禮部以爲本支繁

衍之兆上親獻內殿時前星尙未耀也踰年而生哀冲太子然彌月後卽薨安見其瑞耶

致大鳥

後漢楊震以忤嬖倖死葬日有大鳥高丈餘集震喪前此忠直所致至震孫奇爲侍中靈帝問曰朕何如桓帝奇對以陛下於桓帝亦猶虞舜比德唐堯帝曰眞楊震子孫死後必復致大鳥矣此不過忿極之言乃於楊斛山驗之斛山名爵嘉靖間爲御史時方以言爲諱爵獨抗疏指上過舉語甚切直下獄拷掠無完膚瀕死者數次救爵者周天佐至不勝楚毒死爵錮獄久忽遇赦放

還抵家甫一夕復捕至仍錮之前後在錦衣獄七年始赦歸未幾有大鳥集其舍爵曰吾殆將死乃自爲墓誌果卒爵爲陝西之富平人豈關西苗裔耶何其亦致大焉也漢靈之爲靈其言乃驗於千載後亦異矣隆慶初贈光祿少卿人尙以未得諡爲歉近已諡忠介矣

鬼怪

凶宅

今京師全楚會館故江陵張相第也其壯麗不減王公然特分宜嚴相舊第四分之一耳會館之右一小房雖不及大第十之一然亦軒敞先人以價廉僦居不意其

有祟也遷寓不數月妖魔百出時龍虎山真人在都面  
請手畫一符懸中堂鎮之是夜魅投瓦石端投符上比  
明則糜爛無存先人尋大病給假南還此房爲京師富  
人徐性善所得重構華甍以餽吏部侍郎徐檢庵侍郎  
先與先人比隣至是拓爲大第未久亦以白簡告歸不  
數年性善坐他事被籍沒此房亦爲官物矣蓋白嚴相  
張相以迄性善未及三十年凡三遭抄沒斷非吉地宜  
其爲邪魅所窟穴也先是春月移植一梨樹命工掘地  
稍深見一巨石板叩之空空有聲先人疑其有伏藏亟  
命掩土梨亦他徙觀後日安福鄒太史之被蟻則亟掩

之見卓矣。○京師最多凶宅。歸德沈宗伯爲史官時。從里居補官入都。僦居亦敞潔。與先寓密邇。告先人云。連夕內室燃燭不明。加至十數炬亦然。不知何故。先人勸其他遷。未舉。一日拆坑。則一少婦尸在焉。宛然如生。宗伯大驚。立移他所。此等枉死。伏幣京中。徃徃有之。

土司

人化異類

隆慶間雲南隴川有百夷夫婦入山伐竹。剖其中有水。水中得活魚六七頭。持歸烹食之。夫婦俱化爲虎。殘害人畜不可勝計。百計阱捕。終莫能得。又楊用修滇程記



云百夷家畜一撥斯鬼無形而善噬人魂中者越宿卽死死則百夷取其尸爲醢然其鬼畏犬聞犬聲則遠遁不返又夷人中有號爲僕食者不論男女年至老輒變異形或犬或豕或驢之屬於人墳前拜之其尸卽出爲彼所食蓋亦百夷一種也按小百夷爲熟夷在永昌府西南大百夷在隴川之西俱爲滇中內地而幻化醜穢乃爾古來人化虎食人記載中時有之至於鬼噬人魂則未之前聞其亦蠍射人影之類歟至於拜塚吞骼則又異類中之下劣矣百夷卽獐夷以音相近訛稱○又河川建昌行都司有人變鬼者亦名撲斯○菽園襍記

云北方老嫗八九十以上齒落更生者能夜出外食嬰兒名秋姑鄒繼芳郎中云歷城人油張家一嫗如此其家鎖之室中蓋西南夷之外又有此一類此則妖異而非種族矣

### 夷兵

土司兵最不宜調其擾中國甚於胡虜嘉靖間倭警調陽麻兵調瓦氏狼兵俱貽害東南最慘而終不得其用頃救朝鮮又赦播州楊應龍之罪調其兵五千半途不用遣歸以此恨望再叛正德間流賊劉六劉七之亂亦調永順保靖兩宣慰兵協剿一路聚劫人不能堪流賊

戲謂我民曰吾輩來不過爲汝梳彼土司兵乃爲汝篋矣蓋謂其搜剔之愈密也○應龍播州宣慰司

土司文職

本朝設土司除知府知州知縣俱文職其品秩一如流官此外夷官則有宣慰司宣撫司安撫司長官司蠻夷長官司俱爲文官屬吏部文選司除授是宜竟爲左列矣然查會典則又不然戶部所開州縣凡宣慰司三僅四川之播州屬焉四川宣撫司三一屬戶部二屬兵部長官十六司屬戶廿九司又屬兵何也至雲南之宣慰司凡七俱在徼外卽朝貢亦不盡如期而亦載之戶部

版圖中抑異矣至若湖廣一省則永順保靖二宣慰以至四宣撫九安撫及諸長官司又俱隸兵部無一入戶曹者而貴州宣慰一司則又屬戶部矣似此職掌分裂當以守土受軍民者與掌兵不同耶但自宣慰而下既爲文臣何以俱屬都司鈐轄又如雲南之瀾滄軍民指揮使司乃武官也何以又統浪蕓州文官耶此皆官制之紊當議者且宣慰司雖從三品文職終是夷人嘉靖末年以獻大木功加永順致仕宣慰彭明輔爲都指揮使則文而以武優之是矣其子彭翼南先以倭功加右參政至是又加雲南右布政使遂躋藩臣極品若正德

間加播州宣慰使楊域爲四川按察使是以綱紀重臣  
下領夷酋抑更異矣

緬甸盛衰始末

緬甸古朱波地漢謂之憐國和帝永元中其王獻新樂  
及幻人能變化吐火自支解易牛馬頭或云卽大秦國  
也唐謂之驃國貞元中亦來朝獻宋謂之緬國元世祖  
征服之大德中封爲緬國王其地有江頭太公馬來安  
正國蒲甘所謂緬中五城也地在騰衝西南千餘里其  
夷柔而詐屋廬象馬舟楫之類俱備又製緬鈴爲媚藥  
中第一種其最上者值至數百金中國珍爲異寶男子

善浮水縞髻於頂以青白布纏之婦之髻結於後不施  
脂粉專事佛有大事則抱佛說誓或詣僧決之其文字  
進上者用金葉書之次用貝葉謂之緬書西南諸夷文  
契皆用之其國最爲廣大本朝洪武間遣使往諭尙稱  
爲緬國二十九年始內附入貢永樂元年緬甸頭目那  
羅塔遣使耶尋蹇來朝貢方物以木邦孟養阻遏貢道  
爲辭上優詔答之爲開立緬甸宣慰司以羅塔爲宣慰  
使未幾羅塔加兵孟養殺其宣慰刀木旦事聞上嚴諭  
之始以地歸孟養五年又違父遺命奪其弟馬者速所  
轄地其弟來訴上又鐫戒令還弟資產不聽旣而木邦

宣慰罕賓法代孟養報仇破緬城寨二十餘處獲其象馬諸物以獻上受之時永樂十一年也其後入貢屢愆期朝廷亦不深詰未幾緬甸宣慰新斯加又爲木邦所殺至宣德五年緬甸宣慰莽得刺貢方物蓋斯加子也自是始以莽爲姓宣德八年莽得刺欲殺東倘長官其子入奏得刺又奏木邦宣慰罕門法入境朝廷兩解之正統元年麓川宣慰思任發侵孟養及緬甸欲盡有其地雲南總兵沐晟奏之上命計議撫捕蓋麓川之征張本於此矣正統三年大征麓川命土官協剿至七年任發大敗走過金沙江緬甸宣慰男卜刺浪馬哈省速刺

以兵夾攻任發走入緬爲莽得刺所得囚之阿瓦城奏  
請并其子思機法械送仍要中國分以麓川故地雲南  
屢檄往取未發至十年十二月以兵臨之以地賂之始  
以任發副千戶王政殺之函首入獻尋機法又叛景泰  
二年緬人入麓川又執思機法以去至五年三月獻俘  
於朝自是麓川與緬世爲血仇成化中麓川有遺孽思  
陸發者思任少子也以兵入孟養據其地又取緬甸之  
聽蓋等城緬甸遂微弱不振宏治元年緬甸宣慰卜刺  
浪奏成化間蒙給金牌信符不戒於火乞并批文底簿  
及勘合給賜詔如其請進貢頭目奏此行路經孟養恐



爲思陸發所阻乞官兵護送上又許之至嘉靖五年孟養夷酋思倫攻緬甸破阿瓦城虜其宜慰莽紀歲殺掠無算遂與木邦酋罕列瓜分其地詔遣永昌府知府嚴時泰往諭之不聽紀歲竟爲孟養及孟密土酋思真所殺其幼子名瑞體者本名噠喇避思倫難奔洞吾且二十餘年洞吾與古喇相近古喇酋兄弟相攻瑞體和解之遂部署衆夷絕其道路二夷皆死盡有其地緬自此復盛瑞體已并有古喇因以兵脅服鄰國至嘉靖三十年遂入孟養八百老撾於是緬勢益張卽木邦先以征緬功受賞構怨非一日至是亦臣服於緬反爲嚮導以

窺中國矣至嘉靖三十九年而孟密曾思真與其子思漢相繼死嫡庶爭立境內大亂嗟喇爲報父仇乃納思漢之次子思琢爲婿遣孟密教以篡國奪其兄思宋印因假道以攻孟養迤西諸夷必盡復世仇而後已會所遣將卓吉爲乃頭目別混所殺瑞體大怒自將征之生擒別混父子於是威振諸夷隴川千崖南甸三土司亦聽其役屬矣隆慶六年隴川宣撫司目把岳鳳殺其主多士寧投緬至萬歷四年緬遂大舉入寇攻迤西至雲南副使羅汝芳拒却之至七年緬兵破迤西據有其地至十年岳鳳以緬兵破千崖宣撫司執土婦罕氏以去

未幾緬酋莽瑞體病死體生時值大雪惟瑞屋上獨無  
夜居室燁燁有光及長沈驚狡諂善用兵信賞必罰故  
孑然亡命拓地萬里滇爲之傲旣死子應襄嗣事尤險  
詐有謀畧瑞體展土開疆多賴其力十一年緬酋莽應  
襄糾隴川賊岳鳳寇順寧破施甸猛淋蓋達諸寨殺掠  
無算詔以劉縯爲游擊將軍鄧子龍爲參將會諸夷兵  
共擊大破之俘岳鳳至京寸磔之應襄遁去十五年緬  
酋應襄復攻迤西陷密堵送速二城金騰兵備李材擊  
破之復二城時劉縯鄧子龍功居多至十八年緬入孟  
養二十年緬入蠻莫鄧子龍擊郅二十年緬又入蠻莫

破等練城與投緬叛夷猛卯多俺諸酋分道入寇巡撫陳用賓廣南知府潘文昌議於騰衝築圍城凡八以防緬深入二十一年始擒其將多俺斬之用賓復檄屬國暹羅同攻緬暹羅陽諾之然畏緬不敢加兵也二十三年應裏託孟礎孟艮二土司僞請納款朝議許之比差官賁銀幣以往既至境託詞不受其侮慢不恭至此至二十七年緬攻孟養三十年緬又攻蠻莫土官思政敗奔內地緬以重兵入滇索之撫臣大懼斬思政首畀之緬乃益驕三十一年緬酋雍罕始遣使款貢雍罕蓋應裏子三十四年緬酋阿瓦攻圍木邦宜慰司我軍不

能救遂失之因是五宣慰司復盡爲緬所陷而廟堂置  
不問矣此後緬地轉大幾埒天朝凡滇黔粵西諸邊裔  
謀亂者相率叛入其地以求援因得收漁人之利爲西  
南第一逋逃藪識者憂之按瑞體初年衆無一旅寄食  
異邦奮臂一呼修復舊業轉弱爲強蠶食殊鄰威行蠻  
服其材亦何下慕容垂趙元昊哉應裏少有父風出奇  
制勝益闢故封雲南自此虛耗矣此父子者雖聖朝之  
猘猢亦曾豪之騏驥也雲南所統自府州縣外被聲教  
者凡有九宣慰司七宣撫司其底馬撒與大古刺靖安  
三慰久爲緬所奪滇中可以調遣者惟车里等五夷并

緬甸爲六慰與南甸等三宣撫而已迨至今日三宣六慰盡入緬輿圖中他時南中尙有徵發嚴急不可姑息不可蜀漢之張裔被縛送吳天寶之李宓全軍俱覆非前車耶迤西者蓋俗名實孟養宣慰司也世爲刀姓正統間爲麓川所侵奪訴於朝王驥因而三出師追思任走匿胡議以孟養故地賂緬人緬始以思任獻旣而思陸復取孟養土私據之於是孟養宣慰司不復在屬國之列矣宏治初例繳外夷金牌信符兵部忘舊事亦誤給孟養於是思氏遂自立爲會長屢請復稱宣慰朝廷不許然與緬爲世仇自緬再盛無歲不攻之亦互有勝

負至萬歷十三年始許降稱孟養長官司按麓川之滅  
兆於孟養之入訴其酋父子相繼背斧鑕矣彼思陸者  
以逆子逋誅潛復奮起復父祖仇恥反奪其地據爲己  
有雖故封失守而取償於仇鄰再領民社者又將二百  
年思氏之有後亦何減莽瑞體哉是皆未可以夷裔忽  
之也○孟養舊名蒙樣

### 六慰

雲南徼外土官以永樂二年給銅鑄信符又給勘合如  
外國蓋例外得之者僅六宣慰司曰車里曰木邦曰緬  
甸曰麓川平緬曰八百大甸曰老撾視他宣慰加重初

四夷通事僅譯外國惟緬甸亦設數名其後八百亦如之蓋二司於六慰中又加重焉凡宜慰差人俱稱頭目惟木邦及緬甸凡有陶孟及招綱等名孟養司又有招入俱夷稱本朝亦因其俗不以華音蓋正館中譯字官於是失職矣

### 大古喇

大古喇亦稱宜慰不在六慰中與底馬撒最先爲緬甸所得其先世不知所起亦不知何姓按今禁中諸香極重古喇水爲真龍涎之亞其價超蘇合油薔薇露加倍卽其國所產耶又歐陽永叔歸田錄云西南夷法錦有



鬻至中國者其上織梅聖俞春雪詩眞寶玩也其地卽古喇亦名古刺錦殆謂是歟自嘉靖中葉見吞於緬久不入貢矣薔薇露夷言爲阿刺吉今中國人能僞爲之然其芬馥減眞者遠矣永樂四年大古刺土酋潑的浪那入貢立宣慰司又立小古刺爲長官司洪熙元年底馬撒宣慰使司署司事妹壻跌倒怕莽入貢此後不復再見

老撾之始

老撾者俗呼撾家亦六慰之一本古越裳氏之國自周後不復通中華至本朝永樂初年始備方物入貢因爲

置老撾軍民宣慰使司其地在雲南徼外去八百媳婦  
尙二千餘里爲六慰盡處稱中國皇帝爲天旺蓋天王  
之訛也其俗自來無姓竊意姬公何等聲教越裳已列  
王會何獨吝錫氏耶其酋居高樓見人不下卽天朝使  
客至彼亦然又酋長每代止生一子襲爵絕不生女亦  
無支子此土司之極怪者至萬歷二十六年遣使人貢  
且請給新印上允其奏重鑄老撾軍民宣慰司印賜之  
近聞亦入於緬矣宣德十年老撾宣慰司遣使刀攬掌  
入貢景泰元年宣慰刀線歹死其子板雅蘭掌者襲職  
宏治十二年老撾土舍招攬章遣使人貢并請金牌信

符嘉靖九年老撾宣慰招攬章上疏言安南事狀嘉靖四十四年老撾宣慰怕雅簡章獻馴象然終不曉其何姓

老撾反覆

永樂二年八月老撾軍民宣慰使刀線歹遣人護送安南王孫陳天平來朝訴胡季犛胡奩父子篡逆之罪請上弔伐上命納而廩之未幾安南使至上出天平示之使者識其故王孫皆下拜感泣則老撾實能於交趾與滅繼絕其加意鄰邦甚厚及天平歸國胡奩兵殺之上大怒興師南征邊臣又奏老撾刀線歹與安南交通上

勅責讓何也及交趾黎利第三次反逆時爲宣德二年南征大帥安遠侯柳升卒於軍保定侯梁銘戰死王帥大勦黎利又上表請降云陳氏有陳暲者爲故主陳日燿三世嫡孫竄身老撾者二十年欲正之以事中國上許之命罷兵則老撾又再造安南人也陳暲旣立已入貢奉矣宣德三年四月雲南總兵沐晟復奏刀線歹協助交趾罪不可容上命不必深究又閱月而黎利以本年正月陳暲病死上告矣上以師老兵疲遂廢交趾布政司以黎利權署國事然則老撾反覆狡猾始終與胡氏黎氏朋比以侮天朝眞夷酋中之窮奇擣杙也朝

議既棄安南交人益肆舉兵侵老撾竟欲郡縣之不意  
爲老撾所敗喪失無算正統間又舉兵攻老撾殺其宣  
慰板雅簡章八百夷來援安南又敗歸於是與交趾仇  
不解矣

夷酋三公

夷酋得王號者如瓦剌之順寧王馬哈木賢義王太平  
安樂王禿孛羅至近日北虜順義王俺答之屬皆以穹  
秩羈縻之耳若忠勇王金忠直以胡人仕於朝得授王  
爵最爲異典然自永樂至洪熙始拜太子太保蓋官秩  
之不輕畀如此惟永樂十一年封薩剌夷酋阿魯台爲

特進光祿大夫太師和寧王則直拜三公且勲階與在  
朝文武同號最爲殊寵又賜以誥命金印金盛鞍馬文  
綺絳錦又封其母爲和寧太夫人妻爲和寧王夫人俱  
有賜誥是時文皇方將討瓦剌故褒賞以攜其交至永  
樂二十年魯台遂叛是以文皇三大征之後宣德間爲  
瓦剌所殺蓋負上恩寵敢逞螳臂卒致屠滅而金忠宣  
貴考終一如勲舊順逆之報不爽矣

### 士教官

士官以文職居任與流官同稱者自知府以下俱有之  
惟教職必用朝廷除授蓋以文學非守令比也惟宣德

間有選貢李源爲四川永寧宣撫司人入監宣撫蘇奏  
本司生員俱土獠朝家所授言語不通乞如雲南鶴慶  
府事例授源教職上允之命源爲本司訓導蓋是時滇  
蜀皆有之然皆夷方也又江西泰和縣學儒生王積爲  
本縣訓導則王文端直子也時文端正任禮部侍郎在  
內閣亦宣德年事則異甚矣又土官之設惟雲貴川湖  
及廣西而廣東瓊州府亦間有撫黎之土縣佐若內地  
則絕無惟江西贛州府安遠縣信豐縣會昌縣內四巡  
司各置流官一員土副巡檢一員以土人李梅五等爲  
之亦宣德間事從巡撫侍郎趙新之言也又成宏間贛

州之龍南縣又設土官主簿一員則不憶何年間容再  
考○成化間廣東瓊州府感恩縣有土官知縣姜鑑又  
永樂三年秋七月刑部都給事中楊宏升陝西左布政  
使宏西安人疏辭不允則土人任本處藩伯其後以兵  
事拜督撫隸本土者蓋不可勝紀矣

### 土官承襲

武官襲替例有貲爲憑其紀載生時鄰佑及收生婦人  
甚詳蓋防異姓假冒及乞養之濶也近世作僞者多憑  
空捏造苟得金錢兵部武選司吏胥概爲准行誰計奸  
弊可恨然仗此爲隄防稍杜爭競至於土官則全憑宗



支一圖爲據今惟雲南布政司貯有各土司宗系以故襲替最便而貴州廣西諸土官竟自以所藏譜牒上請以致彼此紛爭累年不決礪兵構難而不肖監司又借以收漁人之利此最大弊事

外國

華人夷官

弇州紀琉球國相程復以饒州人爲琉球相四十年至年八十乞致仕歸故鄉許之命以相國兼長史賜四品服以爲奇事然正統元年更有瓜哇國人貢使臣名財富八致滿榮者自稱福建龍溪縣人姓洪名茂仔取魚

爲業被倭虜去逃至瓜哇爲改今名遣充使進方物今  
乞復業上命給口糧脚力送還其家正堪與程復作對  
時瓜哇同遣使臣名郭信其國王名揚惟西沙上賜特  
勅具海船遣回并以永樂間眞臘等十一國貢使附之  
同行至正統三年瓜哇使臣亞烈馬用良通事良殷南  
文旦奏臣等俱福建龍溪人因漁飄墮其國今殷欲與  
家屬同來者還鄉用良文旦欲歸祭祖造祠堂仍還其  
國上命殷冠帶還鄉間住用良文旦但許祭祖蓋援洪  
茂仔例也宏治十年又暹羅國通事奈羅自言爲福建  
清流縣人因渡海飄至其國今使回便道乞展墓歸國

野獲編卷之四  
許之至正德間鄞人宋素卿爲日本國王婿更異矣。○  
成化十三年暹羅使臣坤祿羣謝提素英必美亞二人  
入貢其名美亞者汀州士人謝文彬也官拜岳坤卽中  
華學士

外夷誇誕

小說載仙居落成稱清寧幾千幾百幾十年此齊諧虞  
初之說與道經所云赤明開皇諸年號相類非實有其  
事宋世日本國僧來朝云其國一姓相傳已千餘年然  
亦未可信惟本朝宣德七年爪哇國入貢其移文乃稱  
一千三百七十六年但不著年號其果爲一姓與否亦

非詰問但如此誇誕近於戲侮當時典屬國者何以不  
拒回想慮失遠人之心耶

也先誇國寶

景帝四年北虜也先已弑其主自立至是遣使通書朝  
貢自稱大元田盛大可汗田盛者華言天聖也未稱天  
元元年其紀號鄙俚不經甚矣書中言凡受天命已得  
其位盡有其土地人民及傳國玉寶宜順天道遣使和  
好且致意於太上皇帝帝加禮宴賞答書卽稱爲瓦剌  
可汗時也先氣已驕盈敢爲嫚書幾同敵國然而不言  
獻璽也迨天順元年則也先已授首太師孛來與阿哈

刺知院以上復辟遣使來奏欲將寶璽來獻上諭之曰爾欲獻傳國寶此意可嘉但此寶已失真卽真亦秦始皇所造不祥之物我朝自有祖宗相傳之寶亦不用此其進與否任從爾便北虜自此心折此後不敢復言道璽矣然先朝已有之永樂八年上諭太師阿魯台曰爾言元氏子孫已絕瓦剌非有誠心歸附故不獻傳國寶自昔堯舜禹湯文武主天下豈有此寶如必以此爲寶則元氏當永保天位何至衰敗如此今脫忽歹等回特遣使偕行諭朕意時阿魯台方強盛故峻詞折之至宣德九年瓦剌順寧王脫歡殺魯台得其玉璽遣使朝貢

入請獻之上報曰王克紹先志遣人進馬具見勤誠殺  
阿魯台尤見克復世仇欲獻玉璽亦悉王意然前代傳  
世之久歷年之永皆不繫此王既得之可留自用大哉  
王言與成英兩朝聖諭雖嚴婉不同皆千古卓見

### 奉使仗節

工科給事中傅安郭驥等自洪武二十八年奉使西域  
留撒馬兒罕者十有三年至永樂五年始遣使臣送還  
安等因言元帖木兒駙馬已死哈里嗣之仍帖木兒之  
孫上乃命發使往祭而賜哈里璽書銀幣安等僅以原  
官改禮科其賞比之蘇屬國更薄是時胡文穆黃文簡

西楊東楊在政府塞忠定爲冢宰皆建文故臣豈愧見  
仗節之士故有意抑之耶○先是洪武二十七年撒馬  
兒罕遣使奉表貢馬二百疋其表中頌上聖德光明廣  
大昭若天鏡又云欽仰聖心如照世之杯使臣中心豁  
然光明蓋照世杯者其國舊傳有杯其明光徹照之可  
知世事故表文云然上因而遣使答之但其國本古屬  
賓國與蒙古道里隔絕何以知彼國駙馬事且旣向化  
歸誠又何以久留使臣史皆不言其故及觀周王孫睦  
祥爲安傳乃云安奉使時酋長諷安使降安叱之因留  
延凡十三年備嘗艱苦知終不可屈乃以禮送還并

獻名馬珠玉以謝歸時以老病乞骸上賜一品服致仕  
仍月給米十二石夫人宣德四年卒上遣官祭仍治  
葬據此則安之寵數厚矣然考之曾襄敏榮所爲傳安  
西游勝覽詩卷序則殊不然安字志道世爲中州名家  
太祖方懷遠人乃遣安往使出玉關八百里往流沙二  
千餘里至哈迷哩涉瀚海又千三百里至古高昌又西  
行至亦刺八里自此水皆西流又西三千里始至撒馬  
兒罕其主與羣下驕倨欲誇其土地之廣遣人導安西  
至討落思安至乙思不罕又南至失刺思還至黑魯諸  
城計萬千餘里凡六年反其國以終不爲屈遂不遣至



其主死始得還蒙給祿免朝又屢出使西域馬哈麻諸國皆入貢獅子名馬珍寶既而以母夫人年高俾之奉養因不復遠出遣使戶部侍郎王淪送安祭掃序曰公竣事還朝文皇屢加賞賜第東華門外宣德二年追崇先考封母安人許歸祭掃是安歸後又仕宦出使二十餘年初未嘗告老並無一品服人夫之賜死後亦不聞賜祭葬也睦樸過侈其鄉人近陳眉公又因其說而筆之未及詳考耳

### 奉使被議

累朝以奉使被譴者不勝紀卽今上己卯以後東西兵

事起奉命出使者多以不能其職得罪初火僧擾於西

北上用廷議遴侍從有時名者閱視九邊楚中周二魯

宏禴

以尙寶少卿兼御史使寧夏事竣薦副總兵哮拜

可爲大將軍拜本降虜以善戰知名次年鎮兵殺撫臣

以叛推拜爲主朝議責周不能先事發覺謫爲典史甲

午年闕白事興行人司晉臺

憲

奉使遼東司中州人負

氣而躁妄自尊大爲撫臣趙抃所怒盡發其受將領賂

遺至盡追沒其參貂等物丁酉年楚人職方主事丁元

甫

應奉

以簡命贊畫遼左與督臣邢少保不咸時給事

中澤州人徐涵

觀淵

奉使勘功至則與丁協力傾在

事諸文武軍中數十萬人皆切齒恨之遂爲朝鮮人所  
訐至揭榜指涵碧爲天朝賊臣約日殺之丁徐俱棄使  
事逃歸已亥大計丁坐貪徐坐浮躁斥降去此數君俱  
才譖著聞以出疆債事一時同入廢籍且近在七八年  
間皆一蹶不復振云同時使日本者有臨淮侯應襲李  
宗城亦爲沈惟敬所給盡棄其節印宵遁歸坐斬繫獄  
後赦出遣戍其人尤猥下不足紀也

奉使不行

正德初封占城國世子沙古卜落爲王給事中李貫以  
次當行祈之於劉瑾得免乃改命禮科都給事于聰往

甫數日而瑾敗聰上言其故上仍命贊往贊至徐州遇盜刺其髮奏乞俟髮長乃行上許之贊後至廣東托故不行延至七年不發乃議令其國人領封冊歸贊還京其被髡眞僞既不可知而抗違君命貽笑異域漫不加罪當時之政令可知矣○嘉靖間給事中吳時來奉使琉球國得旨未行因疏劾嚴相廷杖遣戍人謂其借題避遠差役起爲左都御史被劾及役後奪諡尙指其抗疏爲規避云

野獲編補遺卷四終